



Taulogologo

LE VI'IGA

SETEMA 2018

O le to'atele o tatou a o tatou laiti o se tasi o a tatou masani po'o tiute o le 'au'aunaga o le tali Misasa ma Tapua'iga. Sa masani o afiafi o aso Sa ua na o Tapua'iga ae sa leai ni Misasa, o mea ia mo le lumana'i, e pei o tulafono i vaitau i fa'alaina sa mamalu tele. O Tapua'iga o le vi'iga lea i se isi fa'aupuga, ae sa leai ni tomanatuga po'o ni taimi mo metitasio i Faitauga mai le Tusi Pa'ia na fa'atoa fa'aofi mai i le mae'a o le Vatikano II. Sa tau'ave i tatou e nei sauniga ma e manatua pea i o tatou falesā sa vivi'i ai i le Ali'i ma le matagofie ma le mamalu. O Tapua'iga Mamalu tele sa patipatia i aso Sa ma sa masani ona to'atolu ositaulaga, musika ma le anoanoa'i o moli sela. O se auala matagofie tele sa avatu ai le vi'iga i le Atua na fa'aali lona alofa lē fa'atua'oaia i le foa'i mai o lona Alo e fa'aolaina i tatou mai a tatou agasasla. O le afio ai pea o Iesu o lē na folafola mai e ta'ito'alu pea ma i tatou i sauniga ua tatou faia i le vivi'i atu iā Iesu i Sakalameta Pa'ia.

O nei aso o Tapua'iga i le Eukalisitia ua masani ona fa'atino i se faiga e lemū, leai se pisa, ma le tele o tatalo fa'ametitasio ae le'i amataina le Sakalameta Pa'ia. O le upu Vivi'i ua fa'aliliu mai le upu Peretania "Adore" mai le upu Latina "tatalo atu": ma o le mea lena ua tatou faia. O le a se isi mea tatou te faia. O le a se isi tatalo ua sili atu ona tatou avatu, i lo le vivi'i atu?

O le vivi'i ile Sakalameta Pa'ia ua fa'atusaina i se talanoaga i le mae'a o se mea'ai ma Iesu, ua tatou galala ai i le fia 'a'ai i le atoaga o le olaga ua tatou talia mai iā te ia i le patipatia o le sauniga. O le fa'asoaina o le Sakalameta Pa'ia ua tatou maua ai se taimi mo tatou lava e fa'agalueina ai le upu o le ola ua tautala mai ai Keriso; ua maua ai fo'i ma se taimi mo tatou e tomanatu ai i le moni matagofie o lo'o aumai e fa'aailoga fa'asakalameta, ma o mea e mulimuli mai ai o nisi ia o mafaufauga e sau iā i tatou.

O le Eukalisitia o le mea'ai lea e fafagaina ai tatou uma fa'apea tagata ua fia 'a'ai mo se mea'ai fa'aleagaga. A o ia tu'u fa'atasia i tatou ma ia i le Eukalisitia, ua vala'auina i tatou e Keriso i o tatou igoa ma fa'apa'ia i tatou ina ia o atu ma le alofa ma 'au'auna atu i lona suafa. Ona o ia e sau mai le finagalo a le Tamā ina ia fa'aailoa o ia i le loloto o tatou loto. A o ta'ito'alu ma i tatou e ala i le mea'ai o le Eukalisitia, ua ia fa'atumuina le soifuaga o le Atua ua tatou talia i le papatisoga ma le kofilimasio, toe fafagaina ai le malosi o lenā Agaga ua faia o tatou tino tagata ma ona nofoaga.

Ua foa'i mai e Keriso o ia lava i le Eukalisitia, e le gata mo le ola fa'aleagaga mo latou ua mulimuli atu iā te ia, fa'apea le ola o le lalolagi; ina ia avea ai le Ekalesia – latou uma ua talitonu – ma alagatatau e auala mai ai lana fa'amagaloga alofa, agamalū ma le agalelei, ma le amiotonu lavea'i. ona o tatou ola e mai iā ia, e ao ona avea ma ni fa'atosina e aumai ai isi i lana faigauō. O le Eukalisitia o le vala'au ina ia avea, ma fa'ateleina, le mea

ua tatou talia – o se lu'i ina ia fa'aofi mai Keriso e suia le uiga o o tatou tagata ua natia, i lea aso ma lea aso, ona manino mai ai lea o tatou mo le 'au malaga o le malaga o le olaga, o ni fa'aailoga o le afio ai pea o le Atua.

Se tasi o mau mai se faife'au e fa'apea, o le fa'asoaina o le fala-oa ua fa'apa'iaina e Kerisiano ua tu'ua ai i latou i se tulaga e tatau ona latou fa'asoa atu se falaoa e le'i fa'apa'iaina ma latou e lē iloaina Iesu e pei ona tatou iloaina. O le ute o la tatou tofiga, o ni tagata o le Eukalisitia, o le o atu lea i o tatou tuafafine ma uso ma fa'asoa ma i latou le fala'oa o le fa'auō; e ofo atu le ipu o le agalelei ma le fa'afouina; ia avea ma tagata e si'i atua le apa fafano ma le solo o le lē fai mea fa'apito..

O le faiga lena ua avea ai le Eukalisitia o se tagi mo le fai meatonu; o se mana'oga ina ia fa'amuta le pulea malosi ma le sauā o isi tagata. O se tatalo a le Atua o ia fo'i sa fa'asauaina ma fa'aleagaina. O se tagi a Keriso na tu'ua'ia i se maliu matagā, sa tu'uina atu lona ola, ina ia toe 'au mai ai (Ioane 10: 17). O le Eukalisitia o le tali a le Atua i le lalolagi fia'a'ai; i ni tagata ua le gata ua leai se falaoa fa'aletino, ae fa'apea lo latou tama- li'i'aga.

I le Eukalisitia ua tatou folafola ai Keriso na fa'akoluseina ma na Toetū se'ia toe afio mai. O le mea lea, i le Eukalisitia, o le fiafia ma le fa'anoanoa, loimata ma le 'ata; ua su'i fa'atasi i se masani o se malosi o le toetu ua augatatau ai ona tatou tali atu ma le tagi i le Atua – ina ia tali atu i lana poloa'iga mo se augatapulaga fou ua fa'avaeina i le faimea tonu ma le alofa, o le moni ma le agalelei. A tatou avatu lo tatou maliega i le vala'au a le Atua e o mai ia ma 'a'ai (Isaia 55: 1 – 3), ua tatou aumai i totonu o tatou lava le mana o Keriso na maliu a o lena ua ola e fa'avavau, o ia o lona Agaga e le o se ola ma se alofa e uma ma e malosi atu i lo le oti.

Na fai atu Keriso ile 'au so'o: *ia outou avena ni mea latou te 'a'ai ai* (Mt. 14: 16). Sa Tautala o ia fa'apea ina ia 'auna ne'i fa'aososoa i latou sa mulimuli ia te ia, e tuli 'ese latou sa i ai le mana'omia; po'o le fulitua i le loimata maligi ma le mafatia; po'o le taliga tutuli i le tigā o latou ua afaina. I le Misasa, o mafatiaga ma le malepelepe o lena lalolagi ua tu'u fa'atasia ma tu'u atu i le taulaga a Keriso, o le ua ta'ito'aluina ma i tatou i le ogatotonu o le fa'aleagaina ma olaga ua taulau. Sa fa'amatala e se tasi o Monike le Misasa o se tafaoga. I le Misasa ua tu'u fa'atasia ai a tatou moliga ma le faitaulaga a Iesu. O a tatou faitaulaga laiti uma, popolega ma fiafiaga ua aumai fa'atasi i le laulau ma momoli atu fa'atasi ma le Ali'i, e pei o se tafaoga po'o se laulau ua fa'asoaina, ua tu'u fa'atasi ai mea'ai na tatou aumaia ma avea ma se mea'ai e tasi, ua 'a'ai uma ai le to'atele.

O le Eukalisitia o se fa'amanuiaga e ao ona fa'asoaina ma patipatia ma le fa'afetai; o se faitaulaga e molimoli ma fa'atasi

AFIOGA KATINALE JOHN DEW



UŌ PELEINA (*Tusia mai Aiolani aso 30 Aukuso*)

Fa'atoā tu'ua e Pope Faranisisi i'inei i nai itula ina ua mae'a se asiasiga pisi tele lava mo le lua aso. Sa potopoto tagata mo le Fonotaga a le Lalolagi mo Aiga ma sa fa'aeaea i lona i ai i lea taimi, ae maise le fa'amanatuaina o Aiga i Croke Park anapo – 82, 000 o i latou, fa'apea ai ma pesepesega ma faigasiva, molimau fa'aleaiga ma upu matagofie ma le atamai mai le Tamā Pa'ia. E tusa ma le afa miliona na potopoto i le malae ua ta'ua Phoenix Park mo le Misasa i le asō. Sa timu toe malūlū ae le'i fa'avaivai ai tagata e fa'afeiloa'i i le Pope. Sa gasolosolo lelei le Fonotaga a Aiga o le Lalolagi ma e ui sa i ai ni fa'afitauli ma ni lu'itau o lo'o feagai nei ma le Lotu, o tagata o lo'o tumu i le fa'amoe-moe.

I le fa'ai'uga o le Misasa i lenei aoauli, sa feiloa'i atu Pope Faranisisi i Epikopo a Aiolani. Sa fai atu iā i latou, ma sa fa'aoga ni upu sa tautala ai Sagato Ioane o le Koluse, ***“o le pogisā o le po e susulu ai le malamalama o le fa'atuatua i o tatou loto. Ma o lenā malamalama o le a fa'aioaina maia le***

‘auala i se fa'afouga o le olaga Kerisiano i Aiolani i tausaga o i luma,” Ia manatua, o le aso lea na tu'ua'ia ai le Pope lava ia o le taofiafia o fa'amatalaga ma sa vala'auina foi ina ia fa'amavae. O ia fo'i ua iloaina le “po pogisa”. Sa ou feiloa'i atu i ai na o nai minute ae le'i faia le Misasa ma sa alia'i mai le lelavā ma le vaivai, ma o ana upu e pei ona masani ai “tatalo mo a'u.” Sa ou fa'amafanafana atu i ai o tagata i Niu Sila e tatalo mo ia, ma ou te 'ai'oi atu ai ina ia fa'apena ona tatou faia fa'amolemole – tatalo mo le Tama Pa'ia.

Sa fa'amalosi'au atu Pope Faranisisi i Epikopo uma a Aiolani. O ana upu e manaia i le tomanatu i ai, ona ua ia fa'ataūaina mea uma ua tatou faia. Sa fai mai, ***“o a'u upu iā te outou i lenei afiafi o le fa'aloto teleina i taimi o le lu'itau fa'apenei, ma, fa'asao a o outou 'au'aunaga o ni avefe'au o le Tala Lelei ma leoleo mamoe o le lafu a Keriso. I se 'auala fa'apitoa lava, ou te fa'afetaia la outou galuega fa'aauau mo tagata matitiva, o latou ua i fa'atausi'usi'u ma le lē amana'ia ma latou ua mana'omia se lima fesoasoani...”*** Na fa'amaosli'au ma fa'afetai atu Pope Faranisisi ia outou fo'i.

Ou te talitonu o le taimi tou te maua ai lenei tusitusiga ua ou taunu'u i le 'a'ai o Dublin e faia se talanoaga ma se fa'asoa i ni Pule'aga se lua. Fa'amolemole tatalo mai mo a'u.

Ou te fa'auma i le tatalo muamua o le Fa'atuatua sa tataloina i Misasa a le Pope i le asō. ***“Tatou tatalo mo le Tamā Pa'ia, Pope Faranisisi, ma le 'au leoleo uma o agaga. Ia latou fesoasoani mai ina ia tatou va'ava'ai atu i e ua tatou alolofa i ai e pei ona faia e le Atua, ma iloa ai ia i latou le fa'atusa o Keriso lo tatou uso”.***

Ma Fa'amanuiaga uma Lava

+ Ioane

LE VI'IGA

atu i ai; o le afio ai moni e talosia ma vivi'i i ai. O se olaga fo'i e ao ona olaina; ma ina ia olaina se olaga fa'a-Eukalisitia moni, e ao ona tatou sauniuni e talia i latou ua o mai i se ituaiga o tulaga lava o le mana'omia – latou ua mana'o mo se taimi, se fa'auō, se ta'ito'aluaina, alofa po'o se fa'amalosi'au. Ina ia aogā le patipatia o le Eukalisitia, e tatau ia i tatou ona lagonaina tigā a le lalolagi ma ia tatou a'afia ai i tauiviga mo se lalolagi ua tasi. O le Eukalisitia o se fa'anaunauga a le Atua mo se lalolagi fa'apea: se lalolagi e le o se nofoaga e leai nisi e nonofo ai ae o se nofoaga o le tutū fa'atasi ma le fa'auō. O se lalolagi e mafai ai e tagata ola ona avatu le fa'afetai mo le meaalofa

o le ola: se nofoaga e mafai ona tu'ufa'atasia ai le Atua ma le tagata ma nonofo fa'atasi i le laulau.

O la tatou metitasio lea a o tatou saufafa'i i le vivi'i atu i luma o le Eukalisitia i o tatou malumalu, i luma o Iesu o ia o le punavai ma le fa'atumutumuga o lo'u olaga ma le olaga o le Ekalesia.

Manuia lenei masina i le faigamalaga a le tatou Matagaluega

Salā M. Teofilo

SAGATO

TAMA'ITA'I O LE FA'ANOANO

Mo se vaitaimi sa lua ni sulufāga e fa'amanatu ai le Tinā Fa'anoanoa: o le tasi ua tatou toe fo'i i tua i le 15 o seneturi, a o le isi o le 17 o seneturi. Mo se vaitau sa fa'aailoga pea lava nei sulufāga e lua e le Ekalesia aoao: le tasi i le aso Faraile i luma atu o le aso Sa o le Palema, a o le isi iā Setema.

O le fa'avae fa'atusi pa'ia o lo'o ta'ua ai fa'anoanoaga a Maria o lo'o i le evagelia a Luka 2: 35 ma Ioane 19: 26 – 27. O le fa'amatalaga a Luka i le vavalo a Simeona i le tuia o le loto o Maria i le pelu; ae o le faitau mai iā Ioane e fa'asino lea i upu a Iesu iā Maria ma le so'o pele

O le tele o le 'au tusitusi anamua sa fa'augaina le pelu o le fa'anoanoaga a Maria, aemaise lava ina ua ia va'ava'ai atu i le maliu o Iesu i luga o le koluse. Ona aumai fa'atasi ai lea o ia faitauga o ni valo'aga ma le fa'ataunu'uina.

E va'aia e Sagato Ambrose Maria o se tagata e fa'anoanoa tele ae o se tagata malosi tele i lalo o le koluse. Sa tu ma le lē fefe Maria i vae o le koluse ae na sosola isi. Sa va'ava'ai atu Maria i manu'a a lona Alo ma le fa'anoanoa, ae sa va'aia ai le fa'aolataga o le lalolagi. A o tautau Iesu i luga o le koluse, sa le fefe Maria ina ia fasiofia ae na ofo atu o ia lava i le 'au fa'ao'osala.

FAITAU LE TUSI PAIA

O le Evagelia a Mataio

O le Evagelia muamua i le tala'aga ua avatu lea i le Aposetolo o Mataio. O ia o se tagata sa fa'alataina i ona ia lava tagata, na ao lafoga mo Herota po'o le malō o Roma, o le ala lenā na inosia tele ai ma te'ea e tagata. Ae ina ua vala'auina e lo tatou Ali'i, sa tu'ua loa lana galuega ma mulimuli atu iā Iesu (Mt. 9: 9): o nisi sa vala'au o ia i lona igoa fa'a-Ituaiga o Levi.

O se molimau aupito i matua mo lenei Evagelia i le seneturi lua o se tusi tala o Papias, na fa'apea mai na fa'amaopopo e Mataio tala a lo tatou Ali'i i le gagana Eperu, ae na mulimuli ane ua fa'aliliuina i ni 'auala 'ese'ese. A o a tatou Evgaleia e lē na o ni fa'amatalaga, ma sa tusia i le gagana Eleni. Atonu o ni tusitusiga lona lua, fa'atasi ai ma ni tala fa'aopopo, fa'apea ni fa'amatalaga na fa'aliliuina ('ese mai ai ma fa'aliliuga a Luka). O le mea maitauina o tusitusiga uma ua fa'amaopopo i ni vaega tetele e lima, ta'itasi o tala fa'amatala, soso'o mai ai ma fa'amatalaga tal-afeagai, fa'apea ai fa'atomuaga o lo'o fa'amatala mai ai le fānauga o Keriso, ae fa'ai'u i le tala ole Pasio. E fa'apea tonu lava le fa'atulagaga o se tala Eleni: e le o se mea e mailoa e se Iutaia fa'aalologia, ae ona o Mataio sa galue mo Herota ma Roma.

O le fa'atomuaga ua amata i le tala o le gafa o Iesu (ma ua fa'amamafa mai ai se fafine mai nu'u 'ese), i le fa'a- Eleni o lana *kenese*: o lona uiga o le Tusi lona Lua lenei o Kenese, e fa'aatoa ai le Feagaiga Tuai ma aumai ai i lona fa'ataunu'uga. Na fanau lo tatou Ali'i e pei ona valo'ia e Perofeta: ma le 'au Makoi, tagata o

nu'u 'ese, na o mai iā te ia. O le vaega muamua ua toe fa'amatala le folafolaina o le Malo o le Lagi e lo tatou Ali'i (mataupu 3 – 4), ma le Lauga tele i luga o le Mauga (5 – 7) ua fa'amatala maia le uiga o le ola i lenā Malō. I le vaega lona lua ua tatou fa'alogo ai i vavega e fa'amausalī ai le fa'atuatua o i latou na vala'auina e Keriso (8 – 9), ma lauga (10) ua avatu ai fa'atonuga mo le tala'iga. O le vaega lona tolu (11 – 12) ua va'ava'ai ai i le natura misitelio o le Malō, soso'o mai ai ma ni fa'ata'oto e faigata ona malamlamaina (13). I le vaega lona fa (14 – 17) ua tatou mata-mata i le tula'i mai le iloaina o le Ekalesia i le lalolagi nei o le Malō, ma le fa'apa'aina o Peteru o le Papa na atia'e ai. O le lauga (18) e uiga i le olaga i totonu o le Ekalesia, aemaise le feasia'i o le fa'amagaloga. Ona sau ai lea ma le vaega lona lima (19 – 23) ua talanoa mai ile feitaga'i ma fa'afitauli o le a fa'alavelave i le 'aua'i o le Malō, sau ai i tua ma perofetaga fa'apopole loto o le fa'aleagaina o Ierusalema ma le vala'auina o nu'u uma i le fa'amasinoga mulimuli (24 – 25). O le fa'ai'uga (26 – 28) ole tala ua masani ai o le maliu ma le Toetu a lo tatou Ali'i.

E masani ona maitauina o le tala e uiga i le Pasio e tutusa i Evagelia uma, a o tala e uiga i le 'au so'o ma taimi na iloa ai le Ali'i Toetu e 'ese'ese; e fa'apea fo'i le fa'amatalaga o le fanau mai o lo tatou Ali'i mai ia Mataio ma Luka. Mo nei mea tāua tele e le fesiligia le kopi o le tasi Evagelia mai le isi, ona o molimau e tuto'atasi ma e matuā talitonuina.

E amata a'oa'oga ma galuega fa'amalolō a Iesu a ua sili atu ma le onosefulu tausaga talu ona pulea e Roma lona atunu'u. Sa talitonuina e ona tagata o le a aumaia e le Atua se fa'ai'uga i le pule sauā a Roma. Sa moe miti i le sa'olotoga ma le pulea e latou o lo latou lava atunu'u ma sa sa'ili mo se fa'ailoga e fa'asino i le fougou mai o se vaitausaga fou. Sa fa'amoemoe fo'i nisi o le a toe fa'atū le malo o Iutaia ma le aigā tupu o Tavita o le a toe fa'atula'i mai. O le folafolaga e Iesu o le sau o le Malo o le Atua sa fa'atupula'ia ai se manatu i tagata. Ae le maofa ai ina ua fai mai Peteru o Iesu o le Keriso, lona uiga o le Mesia o le a aumaia le vaitausaga fou, ma aga'i atu i se fanau fouina o le sa'olotoga mo tagata o Iutaia. Ae ui i lea sa alu 'ese mai Iesu mai ia talot-aloga. Sa ia lapata'i atu i ona so'o e 'aua ne'i fa'asalalauina le folafolaga a Peteru.

E ui i le musu o Iesu e a'afia o ia i valo'aga mo le fa'atalitali mo le mesia i na aso, o Keriso (Mesia) o se suafa ua fa'aoga tele mo Iesu i le Feagaiga Fou. O le ulua'i Ekalesia, i le tomanatu ai i le olaga o Iesu, na maitauina ai o le ola ma le maliu o Iesu na suia le fe'au fa'amesia sa fa'atalitali i ai tagata. O Iesu o Keriso lava ia. O ia na fa'aofi maia le sa'olotoga o le vaitau fou ae i se 'auala sa le mafaufauina e ana autupulaga. Sa talitonu Kerisiano na fa'ataunu'uina e Iesu fa'amoemoe, o fa'anaunauga sa moe miti i ai ma mea na fa'aatalitali i ai ona tagata ae i se 'auala na sili atu i lo mea na latou manatu i ai. O lenei fa'ataunu'uina i se fa'amatalaga fete'ena'i – se fete'ena'iga na fa'ailoga ai olaga o latou sa mulimuli iā Iesu: “Auā ai se e fia fa'asaogalemūina lona ola, e maumau ai iā te ia; a o le fa'amaumau lona ola ona o a'u ma le tala lelei, e fa'asaoina e ia.” (Mareko 8: 35).

O fa'amatalaga fete'ena'i o le koluse ua 'ese mai manatu o tagata e uiga i talitonuga. Ua va'ava'ai i talitonuga e maua mai ai le fa'amafanafanaga, o le lagolago, fa'amalosi'au ma le filemū, ae o lo'o fa'apea mai le evagelia e maua e tagata le filemū e ala ile taliaina o le koluse i o latou olaga, e oti i o latou manatu fa'apito ma le agasala.

Ua tatou ola i le manatu e fa'apea o le fiafia e sau mai le mulimuli i o tatou lava fa'alogo'aga, o tatou fa'anaunauga, ma mea ua tatou moe miti i ai. O le fa'aletonu o le ola ai o le tagata o tatou taumafaiga lea e pulea o tatou lava taunu'uga ma o le a mafai ai ona ta'ita'i 'ese maia i tatou mai le Atua. O le misitelio ma le malosi lenā o le agasala i o tatou olaga. E leai lava se isi o tatou e filifilia le agasala ona e leaga, ona e mafai ona mafua ai fa'aletonu i isi, po'o ona e ta'ita'i 'ese mai ai tatou mai le Atua. Tatou te filifilia le agasala ona ua tatou manatu ifo o se lelei e ta'ita'ia i tatou i le fiafia ma le fa'ataunu'uga o tatou mana'o. O le fete'ena'i o le koluse o le te'ena fo'i lea o tatou manatu fa'apito o le ta'ita'ia ai i tatou i o tatou tagata moni ma le fiafia moni.

4

O le tali atu a Iesu i le fa'amatalaga manino a Peteru o ia o le Keriso ua tu'u 'ese ai e Peteru ona ia lava fa'anaunauga i le taunu'uga o le ola o Iesu ma lana galuega 'au'auna. O lenā 'au'aunaga e lē o le toe fa'atu mai o le malō o Iutaia. E lē o le muta'aga o pulega a malō mai fafo ma se amataga o le tuto'atasi ma le fa'aleleia o le tamā o aiga. Na fa'aofi mai e Iesu se vaitau fou. Sa ia fa'ataunu'uina mea na moemiti i ai ona tagata. Ae o le fa'ataunu'uina na faia e Iesu na sili atu i lo a latou mo'omo'oga.

O tatou uma lava e tofua ma le tala o fa'aliliuina: e o'o lava ia i latou na feola mai o ni Katoliko. E le tau tausisi o ni mea maoa'e, e pei o Sagato Paulo na āto i lalo ma fa'atauasoina. Ae i ai lava taimi e suia ai o tatou olaga ina ua tatou iloaina o le fa'atuatua e i ai lona uiga, e tatau ona fa'amaopo mai ma le loloto ma e tatau ona finaua. A tatou malamalama o le mea lea e tasi a leai, e leai ma se isi i le olaga nei e i ai sona lavea'i. O le to'atele o e na liliu ona o le Eukalisitia.

A sauniuni tamaiti mo le Ulua'i Komunio, e taumafai e momoli atu le matagofie o le Ali'i i le tu'uina o mea'ai i le ogatotonu pe fa'apefea ona ia foa'i o ia lava mo tatou. E talanoa mai le Tusi Pa'ia i le fia 'ai mo le Atua. Sa tusia e se tasi o tusi tala e fa'apea: “O se fesoasoani tele mo le talitonuga, o le mataupu o le talitonuga, o le a'oa'oga o le Afio Moni i le Sakalameta Pa'ia o le Aletale. O le talitonuga e aunoa ma lenā e pogisā, faigatā, losika, mo le tulaga o lo'o i ai – ae le talanoaina lona matagofie e tumau pea ae maise lona alofagia. O le Eukalisitia o le afio ai ma le alofa o Iesu, ua mauaina e tatou i se faiga mafana nauā. I le fatu o le meaalofa o le foa'i e Keriso o ia lava le misitelio o le vaivaiga, o le a avea ai le maua ma maua: o le Tino a lo tatou Fa'aola ua fafagaina ai i tatou, ua tu'ufa'atasia ai i tatou ma ia, i se tulaga sa le mafaufauina. Leitioa a tatou ifo i o tatou tuli vae.

O GALUEGA LELEI O LE ALOFA

Ina ua fa'atulaga e Pope Faranisisi le Tausaga Iupeli Uiga'ese o le Alofa, o le manatu autū o le alofa o le Atua: 'e alofa e pei o le Tamā'. O tagata o le Atua ua va'aia o latou e talia le alofa – le alofa o le Atua – e pei ona fa'amatala mai e sauniga, telosia, le fa'aleagaga ma le fa'aaloaloga tele a le tala'aga. Ae ui i lea o lo'o i ai fo'i se fa'amamafa i le Kerisiano e le na o le talia o le alofa o le Atua, ae ia avea ma lē e avatua le alofa. O se tu masani a Iutaia ma Kerisiano e fa'amanatu pea i lea masani a le au fa'atuatua o latou e avatua le alofa e pei ona latou talia.

O le alofa o se uiga ola o le vituti o le agalelei ma ua fa'agāe'etia e le alofa. O se uiga ola, o lona uiga o lo'o faia o se mea; e le na o se manatu. O le faia o se mea na fa'aosofia e le alofa, o lona uiga o le faia o se mea mo se isi, o le foa'i atu mo le isi, ae o le fa'atinoga o le avatu o se aogā mo lē o lo'o foa'ia: o latou ua talia e ala i le latou foa'i. O le Atua e alofa ma o lona alofa ua talisapaia atoatoa pe a aga'i atu i le 'au a'i fa'atasi i le alofa fa'avavau a le Atua: o se tasi ua avea ma fa'aaliga o le alofa mamana. O le fa'aailoaina o lenei moni o le amataga fo'i lea o galuega alofa mole 'au Kerisiano fa'atuatua.

O tala'aga a le Ekalesia Kerisiano e masani ona sa'ili 'auala e fesoasoani ai i tagata e fa'atinoa le alofa. O Sagato Paulo II, mo se fa'ata'ita'iga, i lana tusi o le *Dives in misericordia*: 'O Iesu Keriso na a'oa'o o le tagata e le gata e talia ma tofosia le alofa o le Atua, ae ua vala'auina fo'i o ia e "fa'atino le alofa" i isi. O tu ma aga masani o le fa'atinoina o le galuega lelei o le alofa ua maua ai se aupega aogā mo le 'fa'atinoina o le alofa' a Kerisiano. O le tala'aga ua fa'aailoa ai se aofa'iga e fitu o galuega lelei o le alofa, ma o lo'o mau a'a uma ile tusi Pa'ia. O lo'o faigofie ona maitauina mai le Mataupu 25 o le Evagelia a Mataia ae o lo'o maua fo'i i isi vaega o le Tusi Pa'ia – le Tusi a Topita o lo'o ofo maia se lisi (kataloko) o nei galuega ma fautuaga a Topita (Mataupu 4). O le Koneferonisi a Epikopo a Amerika sa tusia e fa'apea: 'o Galuega Lelei o le Alofa o lo'o maua lea i a'oa'oga a Iesu ma ua maua mai ai se fa'aa'oa'oga mo tatou e fa'aaloalo atu i isi ona o Keriso o lo'o fa'aalia mai iā i

latou. O 'galuega alofa ua tatou fesoasoani atu ai i o tatou tua'oi i mea e manana'o ai fa'alelino.' Latou te tali atu i mana'oga fa'aletagata a o tatou faimalaga i lenei olaga.

O galuega e fitu o le alofa na avea ma vaega o le Tala'aga a Katoliko: Ia fafaga e fia 'a'ai; fa'ainu le ua fia inu; fa'aofu le ua lelavalavā; talia le tagata 'ese; Fa'amalolo e ua mama'i; teuina le tino oti. O le lisi e le umi tele ae o lo'o aumaia ai se manino o le va'ai i ituaiga o galuega ua faia e Kerisiano e fa'aailoa ai le alofa ole Atua i olaga o isi.

O le tusi a Pope Faranisisi mo le Iupeli o le Alofa – sa ia tusia ai e fa'apea:

O so'u fa'anaunauga tele mo lenei Iupeli, o tagata Kerisiano ia tomanatu i *galuega fa'alelino ma le fa'aleagaga o le alofa*. O se 'auala o le toe fafaguina o tatou loto, ua tele ona fa'aletonu i le feagai ai ma le mativa. Ia tatou ulu atu ma le loloto i le fātu o le Tala Lelei le mea o lo'o i ai se tofosia fa'apitoa o le alofa o le Atua. Sa fa'afeiloa'i atu tatou e Iesu i nei galuega o le alofa i ana a'oa'oga ina ia tatou iloa ai po tatou ola e pei oni ona so'o. Ia tatou toe asia nei galuega o le alofa: fafaga e ua fia 'a'ai, fa'ainu le ua fua inu, fa'aofu le ua lelavalavā, talia le tagata 'ese, fa'amalolo le ma'i, asiasi i falepuipui ma tanuina e ua maliliu. E le gata i lea, ua ia tusia: 'e le mafai ona tatou 'alo 'ese mai i upu a le Ali'i mo tatou, ma o le a avea ma vaega e fa'amasinoina ai i tatou: po o tatou fafagaina e ua fia 'a'ai ma fa'ainu le 'au fia feinu, talia le tagata 'ese ma fa'aofu le lelavalavā, ma fa'aalu sina taimi mo le 'au mama'i ma latou i falepuipui.

O le fa'amanatu mai pea o le tulafono 'auro mai le Tusi Pa'ia – fai i isi e pei ona e fai ia te oe lava – ma le poloa'iga mai ia Iesu e 'alofa atu i lou tuaoi ose avanoa lelei mo le olaga Kerisiano e ola ai ma fa'atino. O le vala'au a le Evagelia o le fa'atino o le alofa o le Atua; o le vala'au a Pope Faranisisi ia sa'ili i galuega masani o le alofa se 'auala e fa'aali ai lona alofa, o lona tau i le fa'aailoaina lea o le alofa mamana ua talia .

O LE TAPENAGA E LAUGAINA LE EVAGELIA A MAREKO: (FA'AAUUAU MAI LOMIGA TALU AI)

Refaelu ma le fafine mativa ua oti lana tane

O le vaiaso lona 9 o le Tausaga 1 i le Vaitausaga Masani, o lo'o fesoota'i lava le Evagelia a Mareko ma faitauga mai le Tusi a Topita. O lea feso'ota'iga o lo'o au atu lava i se vaega iloga i le Aso Toana'i, pea faitauina muamua fuaiupu mai le tusi a Topita 12 muamua i le Evagelia a Mareko 12:38-44.

O faitauga muamua uma o lenā vaiaso, na filifilia uma mai le tala manino o se aiga Iutaia faatuatua sa faaunu'ua. O faitauga o le Aso Toana'i mulimuli, o lo'o faamatala ai le toe fo'i atu o le atalii o Topita, o Tovia. E manino mai fo'i, o se mataupu sa sologa lelei, ma i'u lelei. Ina ua uma ni fetai'iga ma se i'a fe'ai faapea ai ma se temoni mata'utia, na taunuu manuia lava Tovia ma Sara ma ni tupe e tele. O se isi vaega e fia faaopoopo, o lē sa malaga faatasi ma Tovia, o le agelu lava o Refaelu, ae sa le'i faailoaina o ia, ma na ia tuuina atu ni vaega o le au o se i'a iā Tovia. Ina ua taunuu, na nini ai e Tovia mata o lona tamā mai le au o le i'a, ma sa faamaloloina ai le tamā matua sa tauaso. Sa lagona le agaga faagaetia o Tovia ma lona tamā i le paga faamisitelio a Tovia sa o lā malaga. Sa manana'o e tuuina atu iai se meaalofa telē, o le afa o le tupe lea na malaga atu ma Tovia i lona aiga.

Peita'i, na teenaina e Refaelu lea ofo. Na ia tuuina atu iai ni fautuaga e uiga i le ola faapaiaina, na ia faailoa iai o ia o le agelu, ma toe fo'i atu i le Atua. I le faatumutumuga o le a'oa'oga a Refaelu, o le fautuaga ina ia faafetai i le Atua ma ia

faia mea lelei e ala i le foa'i atu. "E sili atu ona faatino le foa'i atu nai lo le faaputu auro. O le ola foa'i atu e laveaiina mai ai i le oti, ma faate'a mamao ese atu so'o se agasala.

Na talanoa faalaua'itefe Refaelu e uiga i le t'aua o le loto foa'i. O lo'o aumaia e le Evagelia a Mareko 12, se faata'ita'iga maoa'e o le loto foa'i, o se faata'ita'iga e foliga na tupuga sa'o mai se mea na tupu i le soifuaga o Iesu. I se tasi aso i le Malumalu, na molimauina ai e Iesu nisi o tagata mauoloa o faia ni ā latou foa'i tetele. Ona ia vaaia lea o se tinā ua oti lana tane, o se fafine matuā mativa lava ua oti lana tane, o tuuina atu sana foa'i laitiiti mo le tausiga o le malumalu; o ni kosane (coins) itiiti se lua, e tutusa ma le pene (penny). Tatou te leiloa le igoa o le fafine mativa po'o se mea fō'i e uiga iā te ia ma lona toalua ua maliu. Peita'i, e mafai ona ou talanoa e uiga ia te ia i le asō, ona o le tala matagofie e uiga iā te ia, na saunoa iai Iesu. Na tuuina atu e lea fafine mativa ua oti lana tane se foa'i e sili atu nai lō tagata uma na foa'i a latou tupe. Ona sa latou foa'iina atu ni tupe sa mafai ona latou maua, peita'i, o le tinā sa foa'i ana tupe itiiti, o ana mea uma ia sa foa'i atu, o mea uma sa totoe e tasi ai o ia.

Atonu e manatu se isi, po'o le ā se saunoaga a Iesu e ono

faia e uiga i sui o le palemene ma a latou talosaga mo ni a latou tupe faaalu. Aemaise lava, pe faamata o le a sana saunoaga e uiga i le faipule na ia foai pauni e lima i se faamoe-moega t'aua tele, ae toe talosaga ia toe maua mai lana tupe faatasi ai ma nisi tupe faaalu?

Peita'i, e le'i faitioina pe tu'ua'iina e Iesu ni pisinisi e uiga iā latou foa'i ma isi a latou saofaga. Na te le'i tu'uaiina fo'i tagata mauoloa na faia ni ā latou foa'i tetele mai faasiliga e tele o ō latou tamaoaiga. Ae na ia viia le fafine mativa ua oti lana tane, sa naunau e foa'i uma atu i le Atua ana meatotino sa totoe ia te ia. O se faatinoga maoa'e lea o le loto foa'i pe ā fua i se tagata ua matuā ogaoga lona tulaga mativa.

O le faitauga mai le Tusi a Topita, o lo'o molimauina ai se faata'ita'iga o le loto foa'i uiga ese e sau mai ni tagata se toalua ua le'o toe avea nei ma ni tagata matitiva. Ona o le tupe telē na ia taulimaina, na mauoloa ai Tovia ma lona tamā o Topita faapea ma lona aiga. O se faatinoga uiga ese o le loto alofa na latou faia ina ua ofoina atu ia Refaelu se meaalofoa telē, o le afa o le tupe na malaga ma Tovia i lona aiga. ...*fa'aliliuina Savelina Kasiano*

(LAUDATO SI' – POPE FALANISISI)

6



(LAUDATO SI' – Pope Falanisisi)

MATAUPU LUA

O LE EVAGELIA O LE FOAFOAGA

62. Aiseā e tatau ai i lenei tusitusiga, ona fa'asalalauina i tagata uma o ē loto lelei, ua aofia ai se mataupu e fa'apitoa i le liuaina o ē talitonu? Ua ou iloa lelei o vaega fa'aupufai ma le fa'afilosofia e i ai i latou e tete'e maumaututu i le manatu o le Atua Foafoa, pe manatu foi e lē talafeagai, ma i'u ai ina ave'esea talu ai le lēfetu'utu'una'i i 'oa o saofaga lea e mafai e talitonuga fa'alelotu ona faia aga'i i se vaega taua o le si'osi'omaga ma le atina'ega atoatoa o tagata soifua. O nisi manatu, o tapua'iga fa'alelotu e pei lava o ni aganu'u taufa'avae ina ia fa'atagaina. Ae ui i lea, o le saienisi ma le tapua'iga fa'alelotu, fa'atasi ai ma a latou taulumaga patino e malamalama ai i le mea moni, e mafai ona ofi atu ai i se fa'atalanoaga malosi e manuia uma ai ia vaega e lua.

I. O LE SULU E OFOINA MAI E LE FA'ATUATUA

63. I le lavelave o fa'afitauli o le si'osi'omaga ma le ano-

anoa'i o ona mafua'aga, e tatau ona tatou iloa o le a lē fa'ai-loaina ni fofu mai i le na'o le tasi itu ua fa'amatalaina ma le suiaina o le mea moni. E tatau foi ona fa'aalia le fa'aaloalo i le tele o tamaoaiga fa'aleaganu'u o tagata eseese, o a latou ata ma solo, o latou olaga tupito fa'aletagata ma le fa'aleagaga. Afai e moni lo tatou popole e atina'e se si'osi'omaga e mafai ona fo'iaina mea leaga na tatou faia, e leai se lālā o le fa'asaenisi ma e leai foi se ituaiga atamai e mafai ona tu'ua, e aofia ai talitonuga fa'alelotu ma le gagana fa'apitoa i ai. E tatala atu le Ekalesia Katoliko mo fa'atalatalanoaga fa'atasi ai ma manatu fa'afilosofia; i lenei avanoa e mafai ai e le Ekalesia ona fausia ni fa'aiuga eseese i le va o le fa'atuatua ma le fa'autaga. O le atina'ega o a'oa'oga fa'aagafeso'otai a le Ekalesia ua fa'aalia ai se fa'asinomaga e tusa ai ma mataupu tau agafeso'ota'i; o lenei a'oa'oga ua alagaina ia fa'aoloaina e ala i le la'asia o ni lu'itau fou.

64. E le gata i lea, e ui o lenei Savāli Fa'a-Aposetolo e fa'afeiloā'ia fa'atalatalanoaga ma so'o se tagata ina ia mafai ona tatou faatasi e sa'ilia ala o le saolotoga, mai le amataga sa ou mana'o e fa'aalia pe mafai fa'apefea e le fa'atuatua mausali ona ofoina atu i tagata Kerisiano, fa'apena foi i isi fa'atuatua, le tele o le fa'aosofiaga e tausia le natura fa'apea o latou uso ma tuafafine ua sili atu ona vaivai. Afai o le mea moni e faigofie le avea ma tagata soifua e u'una'ia le tausiga o le siosiomaga lea e avea ai i latou o se tasi o vaega, o le taimi lea o Kerisiano "latou te iloa le latou matāfaii i le foafoaga, ma o latou tiute i le natura ma le Atua Foafoa, o se vaega t'aua o lo latou fa'atuatua." E lelei mo tagata soifua ma le lalolagi lautele, iā i tatou o le au talitonu e sili atu ona iloa le tatou matāfaii fa'alēnatura lea e mafua mai i o tatou talitonuga fa'ale-fa'atuatua.

e fa'auau pea....Fa'aliliuina e Falefou Sio

SAKALAMETA

O le Tuputupua'e o Sakalameta Katoliko

O tausaga i luma ma o le Vaitau Ogototonu (pe tusa ma le 1000 i le 1450 CE), o nisi o taimi ua lauiloaina o le Vaitau Pogisā, o ni taimi faigatā mo le Ekalesia. O le to'ilalo o le Malō o Roma i Sisifo na alai ona mafai le osofa'iga a ituai-ga o Siamani ma le finauga mo le pule na fa'aleagaina ai le tele o Europa. I lenei fe'ese'esea'iga ma le feitaga'i mai i totonu lava ia ma tulaga faigata mai fafo atu, o le ola a'i i aso ta'itasi ua fa'amuamua lea i lo fa'atupulia o mataupu tau telosia. Ae ui i lea i le sefululua o seneturi, o tagata fa'apaupau ua liliu o ni Kerisiano, ma na amata ai loa ona masani i le filemū ma se olaga solosolo lelei. Ua maua ai ma taimi mo fa'afouga o manatu fa'alelotu ma le fa'alalolagi nei. O Monaseri ma nofoaga mo a'oa'oga po'o 'a'oga (mulimuli mai ai Univesete) ua avea ma nofoaga tutotonu o a'oa'oga ia.

I le sefululua o seneturi o le uiga o le upu *sacramentum* ua puipuia, ua amata ona fa'anumeraina sakalameta na o le fitu lava ma o sauniga a le Ekalesia ua fa'atulaga lelei. I le 1150, na faia e Peter Lombard se galuega na ta'ua o 'Fuaiupu' na avea ma tusitusiga mautu i sakalameta, e a'afia ai se vaega i sakalameta autū e fitu sa fa'aogaina i le sefululua o seneturi, sa talia e le 'au fai telosia ma a'oa'o ma na mulimuli mai ai ona talia e epikopo ma fonotaga. Sa fa'amatala e Lombard le 'ese'esega ile va o le fitu lenei ma isi fa'ailoga pa'ia ma sauniga. Mo Lombard o le fitu nei o sakalameta kanone o mafua'aga fa'apea o fa'ailoga o le kalasia, ma o le mafua'aga lea ua 'ese mai ai 'fa'asakalameta' o ni fa'ailoga ae le mafua ai le kalasia, o le Fono Aoao i Lyons na fa'amausalī ai ua na o le fitu sakalameta – o le fitu lava lea ua fa'aigoaina e Katoliko i aso nei o sakalameta.

E tele ni fesili na mapuna a'e e uiga i le fa'amau tumau po'o uiga o paptisoga, kofilimasio ma le fa'au'uga o osi-taulaga, o sakalameta e na o le fa'atasi ona fai:

le a tonu le natura o nei uiga?

se mea e moni i le agaga po'o na o se feagaiga fa'api-toa i le va o le agaga ma le Atua?

Pe sa i ai se 'ese'esega i le va o le uiga o le paptisoga ma isi uiga ua avatu e isi sakalameta?

O se tasi o a'oa'o telosia lauiloa o lenei taimi o Sagato Tomasi Aquinas (1225 – 1274), sa malamalama i uiga o sakalameta o ni suiga i le agaga o le tagata, ua fa'amausalī ai se tasi i le galuega fa'aola a Keriso, o lona tofi ositaulaga.

E pei o isi a'oa'o telosia o lenei vaitau o Tomasi Aquinas na fa'aoga ni vaega, e pei o mafua'aga, a'afiaga, ituai-ga, mataupu, 'a'ano ma foliga, na aumai i le filosofia Eleni a Aristotile. Sa ia fa'amatala o le uiga mao'e o a'afiaga o sakalameta uma lava o le Atua, ona o sakalameta o mea faigaluega po'o 'auala mo galuega a le Atua. Sa ia finau mai e mana'omia sakalameta ona o ni fa'ailoga, ma o fa'ailoga oni vaega alagatatau ia o le olaga a le tagata. A leai nei fa'ailoga, fai mai ai o ia, o le a le iloaina pe masani tagata i le galuega o le fa'aolataga a le Atua. Ae le gata i lea ona ole Atua o le mua'i mafua'aga, o le agava'a o le fai-fe'au e le a'afia ai le mautulaga o sakalameta. Sa finau Aqinas, e tatau ona i ai le **fa'amoemoe** amiotonu e 'au ai i sauniga o sakalameta.

O se vaitausaga o telosia, 'sa'ili le malamalama'aga i le fa'atuatua' i upu a Sagato Anselm. O faiga fa'asikolasipi ia na maua ai e le Ekalesia se losika, fa'amatalaga manino mo sakalameta ma isi talitonuga, e aunoa ma le taumafai e fa'amatala atu le misitelio.

Na tatau malie lava e le 'au fa'apaupau le malosi fa'alemalō ma le fa'aleagaga o lea Vaitau Ogototonu. I le 14 o seneturi, ma o le pisia o le Maliu Uliuli na fa'aumatia ai manatu fa'atelosia. Na fa'aleagaina tagata, o tu ma aga na mou atu, o fetau'iga o oloa ua fa'asolosolo ona motusia ma o a'oga na tapunia a o fa'aleagaina Europa e lenei fa'ama'i.





Malaga a Aua mai Tutuila

Fai mai sa tutu la'au fa'amanuiti le malaga tafafao mai a le aufaipese Katoliko mai Aua i America Samoa, aga'i mai Aukilani i Uelinitone i le aso 23 Aukuso 2018, ma toa'i taunu'u ai i Petone, Lower Hutt i le 6.30 i le afiafi. Sa fa'atumulia lea nofoaga i le lolofi atu o le Matagaluega fa'a-Akiepikopō Samoa i Uelinitone le afioga ia Patele Mareko Api Tufuga, le faipule Paulo Savai'inaea ma le faletua ia Nive, le fa'afeagaiga ia Vito Ono, le ta'ita'i o le matagaluega le Afioga ia Salā Mikaele Teofilo, le Afioga i le ta'ita'ifono ma le Ofisa tu totonu o le matagaluega, le nofo a Peresitene ma ofisa o ekalesia ta'itasi, ae maise tamali'i ma failauga o faletua, tausi ma sa'oao, fa'apea le malosi o le matagaluega i tupulaga talavou, i latou talisapaia ma le fiafia o le taunu'u mai o le faigamalaga.

8

Amatalia lea afiafi i le sauniga lotu ono fetalai lea o le tofa ia Seugali'i Kapeli e fa'afeiloa'i le faigamalaga i le latō i le 'ea, ma le latō i le tai, o le susuga i le fa'afeagaiga ma le faletua, le faletua a le tiakono, a'o le sopoala fo'i ma le lefulefua mai o le ta'ita'i pese ma le aiga pese mai Auā i Tutuila, le afioga o le Sa'ousoali'i ia Unutoa, le matua ia Liufau, o le tama a Aitu ma tagata, le susū o le faleono, mamalu mai le fetalai ia Paopaoailua ma Tufaga, ma le launiusaelua, ona fa'apea foi lea ona tali mai le tofā ia Pau'u aua le faigamalaga ma launiusaelua, ona fa'ai'u ai lea i le taumafataga na saunia lava e le matagaluega.

Alafā'i mai i le taeao na soso'o ai 24 Aukuso 2018, i le 'ava o le feiloaiga, o le usu fa'aaloalo ale Afioga ia Patele Mareko ma Patele Mauga ma le aufaigaluega a le Atua, le ta'ita'i ma le ofisa tu totonu o le matagaluega, ao se usu a lele i le pa'ia i aiga ma tapa'au, a'o le nofo o Peresitene ma faleupolu o le matagaluega, a'o se usu fa'aaloalo i le usoga ia Tumua ma Pule ua matagofie ai lea taeao, ae ua maua fo'i ma mamalu one ua va'ava'alua le aganu'u ma le fa'a Kerisiano. Ona soso'o ai lea ma le taumafataga o le aoauli ma malolo ai loa aua le alo atu i fa'afiafiaga a le malaga i le 7 i le afiafi.

Aso toana'i 25 Aukuso 2018 sa fa'aavanoa lea mo aiga, uo ma e masani e fia asiasi atu i le malaga ae maise fo'i a latou tapenapenaga mo le Misasa.

Malama le aso Sa 26 Aukuso 2018, 11 i le taeao i le malumalu o le

Ekalesia Sagato Petelo ma Paulo i Lower Hutt, o le Misasa sa pese ma tapenaina e le aufaipese ma le faigamalaga mai Aua. Mae'a le sauniga pa'ia a le Misasa na osia e le Afioga ia Patele Mareko ae lagolagosua Patele Mauga ma le faifea'u o le Palisi a Te Awatairangi i Lower Hutt, ona alo ai lea o le aiga pese mai Aua ia latou pesepesega fa'alelotu i le malumalu lava lea. Ona tu'umuli atu ai lea i le nofoaga sa tapenaina ma fa'auau ai latou fa'aevagelia ma fa'amae'a ai lea aso i le toana'i ma le taumafataga na saunia e le matagaluega.

Aso Gafua 27 Aukuso, sa fa'ataunu'uina i le afiafi le 'aiavā a le matagaluega ma le faigamalaga, sa feosiosia'i ai le alofa ma le agalelei o itū e lua pei ona ta'ua i le pese, "Ua tasi le lotu, tasi le fatu, tasi le aiga, o Le Atua na ia aumaia". A'o le taeao na soso'o ai aso Lua 28 Aukuso, na lulu a'ao ai ma fa'atofa seia pai'a le 7 i le taeao faimalaga loa pasi mo Aukilani.

Fata Aneseko Launiuvao





FAITAUGA MO LE MASINA O SETEMA 2018

I faitauga, o le laulau o le Upu a le Atua ua fofola i luma ole 'au fa'atuatua, ma o 'oa o le Tusi Pa'ia ua tatala mo latou. Le mea'ai ua fa'aolaina e tusitusiga pa'ia ua ofoina mai i faitauga mo le patipatia o le Eukalisitia i aso Sa ua maua ai se avanoa e fafagaina ai i le Laulau o le Upu e ala i tomanatunatuga i le fe'au o lo tatou fa'atuatuga Kerisiano o lo'o momoli maia e tusitusiga pa'ia ma fa'amatala lelei mai ai i tala'aga na tu'u lima mai i lea augatupulaga i lea augatupulaga.

I le lua o masina i luma ua tatou fa'aauai ai ona mulumulita'i i le evagelia a Mareko o lo'o aumaia a'oa'oga a Iesu ma le maumaututū, e le maluelue. O faitauga lona lua e le o ni tusi a Paulo ae mai i ni tusi se lua 'ese'ese: le tasi e mai ia Iakopo ma le isi e mai ia Eperu – e ta'ito'atasi ma lona lava uiga 'ese ua atagia mai ai le fa'atuatua Kerisiano – o Iakopo ua lu'itauina mea ola uma e tusa ai ma vituti mai evagelia, o le tusi i Eperu ua ofoina mai se tomanatuga loloto fa'atelosia ia Keriso ma le feagaiga fou ua ia ofoina mai. E tele nauā ni vaega e aogā ona manatunatu i ai mai nei faitauga ma e toe fa'afo'i maia se faitauga atoatoa e maua ai le autū ma ta'ita'i atu ai i faitauga mai lea aso Sa i lea aso Sa.

ASO 2 SETEMA ASO SA 22 TAUSAGA MASANI:

Faitauga muamua: Teuterenome 4: 1 – 2, 6 – 8. Matua: 'Aua tou te fa'aopoopo se upu 'ou te fai atu ai iā te outou; ia outou tautusi i poloa'iga a le Ali'i.

Salamo 15: 2 – 3 (tali), 4 (tali), 5 (tali). Tali: Le Ali'i e, o ai 'ea e nofo i lou fale fetafa'i?

Faitauga lona lua – Iakopo 1: 17 – 18, 21 – 22, 27. Matua: Ia fai outou ma e anaana i le upu.

Aleluia, Aleluia...Ua ou ta'ua outou o uō, auā ua ou fa'aailoa atu iā te outou mea uma na 'ou fa'alogo ai i lo'u Tamā...Aleluia.

Evagelia: Mareko 7: 1 – 8, 14 – 15, 21 – 23. Matua: Ua outou tu'ua le poloa'iga a le Atua, a e taofi i uputu'u a tagata.

Tofitofiga o le Upu:

O se faitioga e faia aga'i i ituaiga 'ese'ese – na o galuega laua'ite e mafai ona galulue ai ma e manino lelei mai ituaiga o mea e su'esu'eina. O le fa'ailogaina o nei mea o se fesoasoani tele lea, ae e lē mafai ona fa'aalia mai ai mea o lo'o natia i le loto o le tagata. O a tatou faitauga o le asō ua mafua ai le fesili o le maitauina ma tu ma āga, mai le Evagelia, o lo'o a'oa'oma ai Iesu o le tausia o poloa'iga o se va'aiga e le mailoa atu ai le a'afiaga o lo'o ta'oto mai i totonu. I se tasi o tulaga o faitauga mai ia Teuterenome ua foliga mai na o se fa'atonuga e mulumulita'ia tulafono. Ae o lo'o manino lelei mai le mafua'aga o le fa'atonuga 'ina ia e ola' ma talia le 'ele'ele ua folafolaina atu e le Atua, ma o nei tulafono e le'i so'ona faia ae o ni fa'aailoga i le 'atamamai ma le va'ai mamao' o nei tagata. O le tusi a Iakopo ua fa'alauatele mai ai lenei manatu – e le lava na o le fa'alogo i nei tulafono, o lo'o i ai ni mea e tatau ona fai – o latou ua maliliu avā ma tamaiti e leai ni matua o fa'aailoga ia o latou ua i ai le mana'omia ma le afaina gofie i sosaiete ma o nei tulafono ma fa'atonuga mo latou fo'i. O Iesu i le evagelia o lo'o mata'itu i le aveva o le tulafono o se vaega o le natura – o le leaga fa'atiapolo e sau mai totonu ma e mai i totonu o le tagata e ao ona fa'aoga mai ai le poloa'iga. O le tulafono fa'a- Kerisiano o tatalo ma le fa'aleleiga ua fa'aailoa lenei tu ma aga o se su'esu'eina o le loto ae le o ni su'ega ua fa'aoga mo mea ua va'aia, ae o se faiga na fuafua lelei ina ia mafai ai e le ola Kerisiano ona usita'ia le upu ua totō i totonu o 'oe.

Metitasio mo le aso Sa aso 2 Setema

UIGA LEAGA

O le tuli 'eseina o temoni, e ui i lea, e le mana'omia ai i tatou, ma tusa lava pe tatou te mafaia ona tuli 'esea temoni, e leai se mea e lelei mo tatou pe a tatou ola ma le lē fa'aetete. *E toatele latou te fai mai ia te au i lea aso, Le Ali'i e, le Ali'i e, matou te lei perofeta ane ea i lou igoa, o lou igoa fo'i na matou tulia ai temoni, o lou igoa fo'i na matou fai ai vavega e tele? Ona ou ta'utino atu ai lea ia te i latou, ou te le'i iloa lava outou; ina o 'ese ia outou ia te a'u, o outou o e fai amio leaga (Mt. 7: 22 – 23)*

E sili atu le lelei mo tatou pe a tatou taumafai e taofiofi le fa'anaunauga mo faita'aga, o le ita, fia tagata ma le mimita i lo le tuli'eseina o temoni. O le alu 'ese mai i agasala fa'aletino e le lava lea; e tatau fo'i ona tatou fa'amamā le malosī mai totonu o lo'o nofo i o tatou agaga. *Auā e alu ae mai le loto o le tagata o le manatu leaga, o le faita'aga, o le gaofi, o le fasioti tagata, o le mulilua (Mk. 7: 21) ma mea fa'apenā – a o mea nei e fa'agae'ae ai tagata. E fa'apea fo'i, ai se va'ai atu i le fafine ina ia mana'o i ai, ua uma ona mulilua ma ia i lona loto (Mt. 5: 28).*

E ui e le'i faia e lou tino se mea, e mafai ona ola le agasala i lou mafaufau. A te'ena e lou agaga ni fa'aosoosoga a le Tiapolo i le faia o tatalo, o le ua'i, manatuaina o le oti, fa'anoanoaga fa'alefa'atuatua ma le fa'avauvau, o le tino fo'i, o le fa'asoa i le pa'iaga, ina ua fa'asa'olotoina mai galuega leaga a le tiapolo. O le uiga lenei o upu a le Ali'i ina ua fai mai, *'ai se e mua'i fa'amamā i totonu o le ipu ma le tanoa, ina ia mama atoa ma le tua'* (Mt. 23: 25 – 26). Taumafai ma le malosī ina ia talafeagai au galuega ma le finagalo o le Atua ona outou maua lea o mea lelei. A pa'ia le a'a, e fa'apenā fo'i lalā (Ioane 15: 5). A pa'ia le fa'afefete, e fa'apenā fo'i le paluga (Kalatia 5^o 9). *A outou savavali i la le Agaga, fai mai ai Sagato Paulo, ona lē faia lea e outou o le tu'inaanau o le tino (Kalatia 5: 16).*

ASO 9 SETEMA ASO SA 23 TAUSAGA MASANI:

Faitauga muamua: Isaia 35: 4 – 7. Matua: E fa’alogo taliga o e tutuli, e pese fo’i le laulaufaiva o le gūgū.

Salamo: 146: 7 (tali), 8 – 9 (tali), 10 (tali). Tali: Lo’u agaga e, ia e vivi’i atu i le Ali’i.

Faitauga lona lua: Iakopo 2: 1 – 5. Matua: E lē ua filifilia ‘ea e le Atua o e matitiva ia tofia fo’i i le malō?

Aleluia, Aleluia...Ua ‘ou ta’ua outou o uō, auā ua ‘ou fa’ailoa atu iā te outou mea uma na ‘ou fa’alogo ai i lo’u Tamā...Aleluia.

Evagelia: Mareko 7: 31 – 37. Matua: Ua ia fa’alogo e sa tutuli, atoa ma e sa gūgū sa ia fa’agaganaina.

Tofitofiga o le Upu:

E i ai se manatu fa’apea o ni aganu’u fa’aonapo nei o le va’aiga fa’aletino ma le foliga fa’alia ua fa’amafafaina mai i nusipepa ma nisi o fa’asalalauga ua faia ma le atamai, ua fuafuaina pe fa’apefea ona foliga tagata ua avea o se auala masani e fa’amasino ai o latou tau. E tāua ai le taugologolo atu ma le lapata’ia e Iakopo o le ‘au Kerisiano o lona vaitaimi i tu ma āga fa’apenei, ona o le fa’amasinoina o le tau o se tasi i ona foliga va’aia ua o se mea ua masani ai. O le tulaga i le sosaiete, o le maua o mea ma le tu lelei ma le tāua ua fa’ailogaina i fa’ailoga va’aia, ua fa’atinoa maia. Na finau Iakopo o le mau’oa i le fa’atuatua ma alofa i le Atua o mea ia e sili ma tāua – e pei ona fa’aauau mai e lana tusi i le vaiaso i luma – e lē o ni fa’ailoga va’aia ae o gaioiga mautū ua fa’aalia mai le ‘suli moni o le malō’. I so’o se fa’apotopotoga Kerisiano lava, i taimi o Iakopo po’o aso nei, o le ‘auala e fa’aulufale mai ai le ‘au matitiva, latou ua lē tagolima ma latou ua le fa’atāuaina ua fa’aalia ai le tulaga moni o le malō.

E pei i le tele o taimi i le evagelia a Mareko e maofa tagata i galuega a Iesu: ‘Sa ia fai leleia mea uma’. Ae sa latou le mala-malama i le tāua o mea sa ia faia. O le faitauga mai iā Isaia i le faitauga muamua ua so’ota’i ai le fa’amalologa o e tutuli ma le gūgū ma le sau o le fa’aolataga mai le Atua. I taimi amata o le Ekalesia sa fa’aoga perofetaga a Isaia o se ‘auala e fa’aalia ai Iesu o lē ua fa’aioaina maia le i ai o le fa’aolataga a le Atua. A le aunoa ma le va’aiga o le fa’atuatua ma fa’amatalaga a le evagelia e le motu o tagata, o le na o le tofosia o mea na tutupu ae maua le uiga. O le vala’au o lo’o i ai nei mo se fa’aevagelia fa’afou o le a mafai ai e tagata ona talia le tofosia o latou olaga i se tulaga o le fa’atuatua ma iloaina ai le Atua ua sau e lavea’ina i latou.

Metitasio mo le Aso Sa 9 Setema

IA AVANOA

E ao ona maitauina a le’i pa’i atu lo tatou Ali’i i taliga ma le laulaufaiva o le tagata pipili o le fa’amaloloina, sa ia ave o ia ma ta’ita’i ‘ese atu mai le motu o tagata. O le fa’amoemoega muamua mo le olataga mo se tasi o le alu ‘ese mai tagata e amio sauā, ma le mea o lo’o lotolotoi ai tagata, ma ifo lona ulu ma le fa’aaloaloe talia le meaalofa o le fa’aleleiga. E ao fo’i ona ‘auna ne’i o tatou manatu ifo o le fa’aolataga e mafai ona fa’ataunu’u a o e faia lava amioga lē tatau, ma fiafia i upu lē migao po’o le fa’aseseina i mafaufauga leaga.

Ae o lo’o i ai lava mo le tagata, fa’atasi ai ma le alofa ma le fesoasoani a le Atua, le ua suia ona ala mai lona tagata tuai, o le ua fa’atupulia i lona loto le fa’aosofiaga a le kalasia mamana, o le ua a’oa’o mai le upu o a’oa’oga fa’alelagi e ta’uta’u atu le fa’atuatua moni, ma u’u mau nei le mana’ona’o mo le fiafia i le soifua maloloina lelei.

O le mea lea na alagata ai, ina ua ave’ese mai e le Ali’i i le tagata pipili mai le motu o tagata, ina ua ia tu’u atu lona tama’ima’i lima i lona taliga, ina ua ia pa’i atu i lona laulaufaiva i lana feanuga, ona fa’aopopo ai lea: Ona tepa a’e lea i le lagi ua o’i ma fa’apea mai, “*Efata*” o lona uiga “*ia avanoa*”. *Ona pūpū ai lea o ona taliga ma matala fo’i le noanoaga o lona laulaufaiva*. Sa talafeagai ina ua fa’asaga atu lo tatou Ali’i e fa’amalolo le ali’i ma’i, ma sa tepa a’e le Ali’i i le lagi ma o’i.

O lo’o fa’ailoa mai le mea e sau mai ai le fa’amalologa o lo’o fa’amoemoe i ai, ma se ma’elegā mo le lagona ua agasala ma loimata e maligi mulimuli mai ai e ‘a’apa atu i ai. Sa ia tepa a’e ile lagi ma o’i ona ua fa’anoanoa mo i tatou sa ia faia ina ia maua mea tau i le lagi, ua tuli ‘esea mamao i mea tau lalo nei. Sa ia tepa atu i le lagi ma o’i ua ta’u mai ai iā i tatou, o ai ua alu ‘ese mai le fiafiaga o le lagi e ala lea i fa’amalieina i mea tau lalo nei, ma o le toe fo’i i nei fiafiaga e ao ona ausia i le o’i ma le mapusela.

ASO 16 SETEMA ASO SA 24 TAUSAGA MASANI:

Faitauga muamua: Isaia 50: 5 – 9. Matua: Na ‘ou tu’uina atu lo’u tua i e sasa mai.

Salamo: 116: 1 – 2 (tali), 3 – 4 (tali), 5 – 6 (tali), 8 – 9 (tali). Tali: “ou te savali i luma o le Ali’i i nu’u o tagata ola.

Faitauga lona lua: Iakopo 2: 14 – 18. Matua: O le fa’atuatua, pe afai e lē se galuega, e mate lava ia.

Aleluia, Aleluia...O lau afioga o le upu moni lea; ia e fa’apa’iaina i matou i le upu moni...Aleluia.

Evagelia: Mareko 8: 27 – 35. Matua: O oe le Keriso. E tatau ona tigā le Atali’i o le tagata i mea e tele.

Tofitofiga o le Upu:

E malie lava pe a fa’atusatusa le fa’amatalaga a Mareko i le mea lea na tupu i fa’amatalaga a Mataio ma Luka. O le tele o le ‘au popoto o le a fa’apea mai o le tala a Mareko e muamua atu ma e foliga mai o isi ua taumafai e fa’amāmā lona a’afiaga, ona o le a’oa’iga malosi na vavao atu ai Iesu iā Peteru ‘Inā alu ia i o’u tua Satani’ e lē maua i le tala iā Luka; ae o Mataio ua toe faia i se ‘auala lelei fa’apea ‘o oe o Peteru ma o luga o lenei papa ou te atia’e ai la’u ekalesia’ ona a’oa’i ai lea. O le tala a Mareko e uiga ‘ese ai lava, ma e lua ni mafua’aga ua fa’ailoa maia pe aiseā. O le fa’amaumauga a Mareko e fa’apea na ‘liliu atu Iesu ma va’ai atu i ona so’o’ ma ua a’oa’i atu ia Peteru – ona mo latou sa fa’atasi ma ia na malosi ai le leo o Iesu ia Peteru, ona o lona sesē ina ne’i fa’asesēina ai ma isi. O le mafua’aga lenā o upu a Iesu na soso’o ai e uiga i le amoina o le koluse a se tasi ma fa’afiti o ia iā te ia lava. Mo Mareko o le tala fa’aapokalifa i se tagata na fa’akoluseina sesē ae le o Iesu, po’o Iesu e le’i maliu i luga o le koluse ae na toe fa’aola mai, e le gata e sesē, ae o le a avea ma tauemuga i le uiga o Iesu. O lo’o i ai se tulaga e lē ufiufia o le evagelia a Mareko, ae o le lē ufiufia ua mau a’i i le iloaina o le leaga tele o le fa’akoluseina o Iesu ua talafeagai – a leai se fa’atuatua, e leai se fa’aso’oina, leai se evagelia ma e leai se Toetu e aunoa ma le koluse. Se vaega o lenei va’aiga o lo’o maua fo’i i le tusi a Iakopo – o le fa’atuatua e fa’amatalaina e galuega ina ia moni. O le fa’amausalīina e Peteru o le fa’atuatua ua lelei, ae o le a vala’auina Peteru e molimau i lenā fa’atuatua e ala i lona fo’i fa’akoluseina. Ole moni o le ola a’i i le fa’atuatua o se mea e ao ona fa’ailoa e so’o uma i o latou olaga.

Metitasio mo le Aso Sa 16 Setema

AMO LAU KOLUSE

Afai tatou te fa’alatalata ile koluse a Iesu ma Maria, e tatau ona fa’ateleina pea lo tatou iloa i le misitelio o le koluse ina ia toe ola ai....

O le koluse, i luga atu o mea uma lava, e fa’a’ese ma vaevaea. E vaevaea mea e totino i le agaga mai mea e o le tino (Kalatia 5: 24), o mea e totino i le fa’atuatua mai mea o le tulafono (Kalatia 5: 11), o le tagata tuai mai le fou (Roma 6: 6), o e talitonu mai e e lē talitonu, Kerisiano mai Iutaia ma Eleni (1 Korinito 1: 18), ma le Kerisiano lava ia mai le lalolagi...

O le koluse e tu’u fa’atasia, e talepe i lalo pa puipui o le ita, e fa’aleleia tagata i o latou va fa’apea ma le Atua...

Fa’afetai i le koluse a Keriso o latou na taumamao atu ua toe aumai fa’alatalata mai, o le pa puipui ua talepe i lalo, ma o tagata uma ua fa’atasia...

O le koluse o mea uma ia ua tu’u fa’atasia. Ua fa’a’ese’ese ina ia tu’u fa’atasia. Ua vavae’ese mai le lalolagi ina ia tu’u fa’atasia ma le Atua; ua fa’asaoina mai le korupisia ma tu’u fa’atasia i latou uma ua talia le fa’akoluseina ma Keriso. Ua manumalo i fe’ese’ese uma, ma fa’alia ai isi o latou natura fou ua lauiloa ai uō mai fili o le sataulo o Keriso (Filipi 3: 18)

O le koluse e fevaevae ma fa’a’ese. E moni lava lenei mea. O le mea faigaluega e fa’aoga e le Atua e teuteu ai Tatupu o le vine tele o le Tino o Keriso

O le fa’atumutumuga o mea uma lava o le koluse e tu’u fa’atasia. Ua feso’ota’i le tasi i le tasi. Ua tatou malamalama ma amana’ia. O ai lava ua puapugatia so’o e fa’aitiitia le lotovivi’i ma iloa atu le mativa o isi; ua mafai ona agalelei atu.

Ae ui i lea, o le koluse ua tu’u fa’atasia fa’apitoa ai i tatou ma le Atua

ASO 23 SETEMA ASO SA 25 TAUSAGA MASANI:

Faitauga muamua: Poto 2: 12, 17 – 20. Matua: Ia tatou fa'asala ia te ia i le oti e aupito leaga.

Salamo: 54: 1 – 2 (tali), 3 (tali), 4, 6 (tali). Tali: O le Atua, o lo'u lea fesoasoani.

Faitauga lona lua: Iakopo 3: 16 – 18; 4: 1 – 3. Matua: Ua lūlūina le fua o le amiotonu ma le filemū e i latou o e fa'atupui-na le filemū.

Aleluia, Aleluia... O lau afioga o lau upu moni lea; ia e fa'apa'iaina i matou i le upu moni... Aleluia.

Evagelia: Mareko 9: 30 – 37. Matua: Ua tu'uina atu le Atali'i o le tagata i lima o tagata. Afai e fia muamua se tasi, ia avea o ia ma 'au'auna o tagata uma.

Tofitofiga o le Upu:

O le sini autū mai faitauga e tolu o le asō o le fetaua'iga. A 'ese'ese tulaga o ni finauga, o le manatu o le una'ia malosi loa o le manatu a se tasi. O le mafua'aga lea na sa'ili ai latou e lē talitonu i le Atua e osofa'ia ma tua'ia le tagata amio tonu. Ua talanoa mai Iakopo i le lē fealofani o tagata ua o'o lava i le tulaga ua manatu ai e fasiotia se tasi ina ia faia lava le mea o lo'o mana'o i ai, ma na fa'atonutonu ai e Iesu le to'asefululua ona ua latou finafinau po'o ai o latou ua sili le tāua. E ao ona manatu pea o faitauga uma e tolu o tusitusiga fa'alelotu o lo'o talanoa atu i tagata o le fa'atuatua. O le fetaua'iga ma le fa'anaunau ina ia manumalo i isi tagata ua lē na o lalolagi fa'afitafita ma faipisinisi – ua maua fo'i i fa'apotopotoga o le fa'atuatua. Ua fa'amaonia lea mai tala fa'asolopito – pe tatou te va'ava'ai i le ma'alofia mata'utia o le vaitau o le Fa'afouga po'o le te'ega na fa'alia i ni uiga malolosi i se mea fa'atauva'a lava e pei o le ave'esea o se fa'atusa, suia o taimi o Misasa i aso ta'itasi i se falesa. O faitauga uma e tolu o lo'o manino mai ai ni a'oa'oga i le leaga o ni tali fa'apena – ma e ao ona manatu o tagata e le fa'atuatua i le Atua na osofa'ia le tagata amio tonu. O lo'o i ai se loto leaga ma le fia tagata i le nu'u o lo'o talanoa atu i ai Iakopo, fa'apea i latou sa mafana le mafutaga ma Iesu ua matele i le fia tetele, ma sa mana'omia le toe fa'amanatu atu i ai o le 'au'aunaga o fa'aailoga ia o so'o o lo'o sa'ili e avea ma tagata e lē tāua. I se tasi o manatu 'aua ne'i fa'ate'ia i tatou o tagata sa fa'aogā e talitonuga ma mea tau i talitonuga – ona e i ai o latou tāua. E mafai fo'i ona finauina o latou na auina atu i isi Kerisiano i le sala oti i taimi o le Fa'afouga na faia ma le ma'elegā, latou ua le toe 'au'atu i mea fai a le palisi ona o suiga ua faia ona o le fa'anaunau mo le sauniga. Ae ui i lea, o le lē fealofani ma le fetaua'i ua tatou avatu i le lalolagi o fa'aailoga ia o le agasala. O le nu'u o so'o fa'afetaui atu i fe'ese'esega e ala i tatalo ma sa'ili ina ia 'au'auna atu i isi – o le ala lenā a le Ali'i.

Metitasio mo le Aso Sa 23 Setema

TALIA O LE FANAU

O le avea ma tamaiti laiti, o le sasa'a 'ese atu lea o tatou tagata manatu fa'apito, tagata manatu tau i le tino ina ia fa'an- ofoali'i le Atua i totonu o tatou tagata. Ia tatou tia'i lea mana'ona'o ua mau a'a i totonu o tatou, o le avea ma ali'i o mea uma ua tatou sa'ilia, ma fuafuaga mo tatou lava, e tusa ai mo a tatou lagona, o le a le mea e lelei po'o le leaga mo tatou. O le avea ma fanau Fa'aleagaga la, ua fa'avae lea i se tali autū i le agasala a Atamu. Na vavae 'ese mai e le tagata o ia lava mai le Atua i le fa'amoemoe ina ia ola...na mana'o le tagata ia avea ma sē e le mana'omia se fesoasoani, ma na ia faia o ia lava ma pagota....

E leai se mea e telē atu lona tau i lo le avea ma tamaitiiti, e o'o lava i le uiga fa'aleagaga na fai mai ai Iesu, ona o la tatou tauiviga atoa mo le ola e toso 'esea i tatou ina ia fa'amautu ma fa'amalosia o tatou tagata. E ao ona tatou puapuaga tele ina ia avea i tatou ma tagata matutua ma sa'ili o tatou ala mo le tagata i le lalolagi ua le o toe tagatā. ...

O le tamaoiga o le Fa'aolataga, le mauaina o le tino atoa o Keriso ua fa'amautu mai – tausuauiā – na o le fa'aauuina o le fāoa o mea totino, le fāoa na alualu i luma i "ala laiti". E ao ona tatou fa'asilisili o tatou lava i se lumana'i le taupulea i olaga o le tagata, ia feso'ota'i i le lalolagi nei ma le afio ai pea e fa'avavau o le Tama o lo'o galue pea ia i tatou. I o tatou olaga fa'aletagata e alu o tatou olaga i lona taunu'uga i le fa'aopopoina o ni galuega. I se va'aiga maualuga o le malō, o le anoanoa'i o folafolaga mamalu na faia mo tatou ua amata ona fa'atupulia le fatu o le papatisoga. Na ona tu'u atu lava i le Atua e faia, ma tali atu i le maualalo ma le mafanfana i lona alofa i taimi ta'itasi. E le o fai mai le Tamā iā i tatou e fa'aputu ni 'oa e o'o i ai le 'elea, ae i aso ta'itasi ma i le mafaufau loloto e fa'aolua ai agaga aga'i atu i ana oloa e le pala.

E le tatau ona i ai se finauga i le va o le tuputupu a'e se'i matua na mana'o i ai le Atua mo tatou, ma le tulaga fa'atamaitiiti ua ia fa'anaunau tatou te tutumau ai. O le tamaitiiti fa'aleagaga ua le gaiio i le na o le va'aiga; ae o le mea moni lava, o le tu'u fa'atasia o le lotomaulalo ma le talitonuga ua a'afia ai taimi ta'itasi o tatou olaga. O le nofo ai i le Atua o le ola lea. O le vavega lena o le Kerisiano fou ua asu maia le vai ola mai le alia a le Atua

FAITAUGA MO LE MASINA O SETEMA 2018

ASO 30 SETEMA ASO SA 26 TAUSAGA MASANI:

Faitauga muamua Numera 11: 25 – 29. Matua: Ua e matau'a 'ea ona o a'u? "ou te mana'o lava ia fai ma perofeta le nu'u uma o le Ali'i.

Salamo: 19: 7 (tali), 9 (tali), 11 – 12 (tali), 13 (tali). Tali: E tonu fe'au a le Ali'i, e fa'afiafia ai le loto.

Faitauga lona lua: Iakopo 5: 1 – 6. Matua: Ua pala la outou oloa.

Aleluia, Aleluia...Le Ali'i e, ia e tatalaina o matou loto ia naunau i afioga a lou Alo...Aleluia.

Evagelia: Mareko 9: 38 – 43, 45, 47 - 48. Matua: O lē e 'au 'ese iā te i tatou, e 'au fa'atasi lea ma i tatou. A fa'atausuaia oe e lou lima, inā tu'u 'ese ia.

Tofitofiga o le Upu:

O le faitauga mai iā Iakopo i le asō, e matuā faigatā ona suia ona o se āta maoa'e e faigofie ona tau, ona matamata i ai ma tu'u ai pea. O se fa'aosoosoga lena e ao ona te'ena. O ni mea na tutupu talu ai nei i mataupu na a'afia ai vaega tau teugā tupe, le alualu i lalo ole olaga ma le fa'aitiitia o tupe fa'aalu mo le lelei laua'itele i le lalolagi atoa – ae le afaina ai le mativa tau i a'oa'oga ona o le leai o se amiotonu ma le leaga – ua alia'i mai ai le moni o le lu'itau mai iā Iakopo. Sa tusi malosi Pope Faranisisi e uiga i vaega nei – ma sa tu'ua'ia e nisi. "Ou te fa'amalosi'au iā i latou ua i ai le tomā i mataupu tau tupe ma ta'ita'i fa'amalō e manatunatu i upu a se tasi o ali'i atamai: "O le lē fa'asoaina o 'oa a se tasi ma le 'au matitiva o le gaoi lea mai iā i latou ma ave'ese o latou olaga. E lē o ni a tatou oloa e taofiofi, o latou e ana". O latou sa te'ea Pope Faranisisi e le fa'ate'ia, ae o tulaga o le tamāoaiga o se lu'itau lea mo tagata uma ua filifilia e ta'ua i latou o Kerisiano ma fa'aailoa i latou fa'atasi ma lē sa fa'auō ma le 'au matitiva ma latou ua i tulu'iga o le sosaiete.

O le faitauga muamua ma le vaega muamua o le evagelia ua pa'i i le meaalofa o le perofetaga – ma o le fa'aperofetaina e le fa'apea ua valo'ia le lumana'i, ae tautala i upu a le Atua i le taimi nei, ae maise o se upu ua lu'i ai ma vala'auina e salamō. O ni tagata fa'apea e a'afia ai Perofeta tetele o le Feagaiga Tuai, ma e masani o olaga o tagata mau'oa ma le malosi o latou ia sa aga'i i ai upu a le Atua na tautala mai e ala i perofeta. O le ekalesia a le Atua ua vala'auina pea ina ia fa'aperofeta – i lo le ta'uta'ua.

Metitasio mo le aso Sa 30 Setema

Aua o la Keriso i Tatou

Afai e fia aga'i i luma lou soifuaga, e lua lava mea e tatau ona e manatua: o le loto maualalo ma le loto alofa. O lona uiga, o a'u lava ia e leai. E leai sa'u mea. E tasi le mea ou te naunau iai. O le agaga ma le uiga loloto o ia upu, e tatau ona fai ma ou ta'iala i taimi uma, e ui ina o ia 'upu e lei afua mai lou mafaufau, aua e le taua ia.

O le loto maualalo o loo fa'apea mai, e leai se a'u. E leai sa'u mea. Ae o le loto alofa o loo fa'apea mai, e tasi le mea ou te naunau iai, e na o Iesu lea. O ia manoa e lua, pe a tu'ufa'atasia ia Iesu, o le anapuna ae ai se leo malie i le kitara o lou agaga, pe a tagofia ma le atamai e tama'ilima o le fa'autauta. O le maualalo e te tā ina ai le tasi, o le maualuga foi lena o le a tatagi ai le isi. O le tu'uitiitia o lou manatu o 'oe e leai sau mea e ala i le loto maualalo, ole fa'ateleina foi lea o lou naunau e fia maua Iesu e auala i le alofa.

Ou te le o talanoa atu i le loto maualalo o le tagata ua iloa lana agasala ma ona vaivaiga ma fetaia'i ai ma puapuaga o le nei olaga, poo le lagona i le iloa lelei o vituti o isi tagata, aua e ui ina moni ma fesoasoani lea ituaiga o loto maualalo, ae fa'alalolagi ma lē mama, e leai foi se filemu ma se uiga tusa'afia o iai. Ae o lea ou te talanoa atu i le loto maualalo e lagona i le agaga ua lofia i le kalasia e auala alofa le mavae o Iesu. Afai e te lei mafai ona e iloa ia mea i mata o lou agaga, talitonu nei loa, aua o le mea moni lea. Aua o le iloa o lona tagata moni e auala mai i le fa'atuatua atoa ma le talitonu ato'atoa, o le a e lagona ai o oe o le tagata aupito maualalo ma leai se aoga, e ui ina e leai se agasala ua e faia.

O lea ituaiga o loto maualalo, e matua matagofie ia. Aua pe a faatusa ia Iesu, ona manino lea o le mea moni lava, e leai se 'oe. O le tulaga lava foi lea e tasi, e tatau ona e fa'amasino ai ma e iloa, e leai sau mea ma fa'apei ai oe o se ipu e leai sona malosi e na te faatumuina ai ia lava. Auā po o le a le anoanoa'i o galuega lelei i fafo ma totonu e te faia, e leai lava sau mea, se'ia vaganā ua e manino ma malamalama lelei i le alofa tunoa o Iesu. Auā ua na o le vai aupito sili lena, e leai se isi vai e mafai ona faatumuina ai lou agaga. Ona o le taua o lenei mea, ia e mafaufau i sau mea o iai ma se mea e masani ona e fai, ae le fa'amalieina ai oe, pe a lē aunoa ma le alofa tunoa o Iesu. Tu'u isi mea uma ma faagalo ia te oe, ina ia e maua ai le mea aupito sili.

Tauologologo

FAITAUGA MO LE ASO MUAMUA O OKETOPA

Aso 7 Oketopa Aso Sa 27 Tausaga Masani: Faitauga muamua: Kenese 2: 18 – 24. Matua: E avea i laua ma tino e tasi.

Salamo: 128: 1 – 2 (tali), 3 (tali), 4 – 5 (tali), 6 (tali). Tali: Ia fa'amanuia mai le Ali'i iā te i tatou i aso uma o lo tatou olaga.

Faitauga lona lua: Eperu 2: 9 – 11. Matua: O lē na te fa'apa'iaina mai, atoa ma i latou uma e ua fa'apa'iaina, e tasi lo latou tupuga.

Aleluia, Aleluia...Le Ali'i e, ia e tatalaina o matou loto ia naunau i afioga a lou Alo...Aleluia.

Evagelia: Mareko 10: 2 – 16. Matua: O e ua fa'atasia e le Atua, 'aia le fa'ate'ate'a'eseina e le tagata

O LE FA'ASOLOGA O MISASA MO SETEMA 2018

1st. Sunday	0.8.30am	Strathmore	Leai se Misasa
2 Setema 2018	10.30am	Taita	Patele Patrick
	11.30	Titahi Bay	Patele Maleko
2nd. Sunday			
9 Setema 2018	11.30am	Naenae	Patele Maleko
	9.00am	Te Wairua Tapu -Wainuiomata	Patele Denis
3rd. Sunday			
16 Setema 2018	11.00am	Newtown	Patele Maleko
	11.30am	Heretaunga	Leai se Misasa
4th. Sunday			
23 Setema 2018	11.00am	Lower Hutt	Patele Maleko
	11.30	Stokes Valley	Patele Petelo
5th. Sunday			
30 Setema	12.00pm	Misasa Aupalavou—Titahi Bay	Patele Maleko

KALENA A LE MATAGALUEGAMO SETEMA 2018

Aso To'ona'i 8 o Setema—BBQ a le Matagaluega i Petone @ 10.00am

Aso To'ona'i uma o Setema—Pese Practise Aupalavou @ 4.00pm

Aso Faraile 14 Setema Fonotaga Matagaluega 6.30pm

Aso 29 Fiafia Night Matagaluega